

Glaubigen Kindern Gottes ist die Predigt vom Reich Gottes gar lieb vnd angenehm/ vnd richtet grosse Freud vnd Wonne an / wie Geschrieben stehet Esa. 9. Für dir wird man sich freuen/ wie man sich freuet in der Ernde/ wie man frölich ist/ wenn man Beuthe auftheilet. Wie auch Luc. am 2. Der Engel des HERRN/ mit der Himmlischen Botschafft die Hirten im Felde tröstet vnd spricht: Sihe ich verkündige euch grosse Freude/ die allem Volck widerfahrn wird/ denn euch ist heut der Heiland Geborn/ Welcher ist Christus der Herr in der Statt David/ vnd daher wird auch die Gnadenpredigt / Evangelium: Ein gute Botschafft genannt/ dadurch (wie Ambrosius redet) alle arme Sünder zum grossen Ablass vnd reichen Gnadenschaz in Christo beruffen werden.

Vnd ob gleich bey dieser frölichen Botschafft mancherley Trauer Zeitungen von allerley Kummer vnd Jammer mit vnterlauffen/ darüber auch viel fromme ihre Hände vnd Herzen winden vnd wenden/ so pfleget doch immer heilsamer trost mit zu folgen/ mit welchem die bittere Vermut der Trübsalen vberzuckert/ Sanfft vnd Träglich gemacht wird/ wie Christus Matth. am 5. spricht: Seelig seid ihr / wenn euch die Menschen vmb meinet willen Schmehen/ Versolgen/ vnd reden allerley vbelts wider euch/ so sie daran Liegen/ Seid frölich vnd getrost/ es wird euch im Himmel wol belohnet werden.

Darauff auch S. Paulus zeigt Rom 8. vnd spricht: Dieser Zeit Leiden ist nicht werth der Herrlichkeit / die an vns soll offenbaret werden. Apocal. 21. stehet: Gott wird abwischen alle Threnen/ von iren Augen/ vnd der Todt wird nicht mehr sein/ noch Leid/ noch Geschrey/ noch Schmerzen/ wird mehr sein etc.

Auch wird durch die Botten bedeutet / wie vnser Leben ganz schnell dahin leufft/ Psal 90. Vnd wie der Todt den Gottlosen ein vnwillkomener Botte vnd rechter Schreckengast